

REGIONAL NEWS

VVP-2

Rural Development & Administration Minister Prof. Lalnilawma chuan Border Area Development Program (BADP) thlaktu tur Village Vibrant Programme-II chu Mizoram leh hmarchhak state-te'n a rang lama an hman tangkai theih na'n inkaihhruaina tihchhuah vat a tul thu a sawi.

Hei thu hi Vibrant Village Programme-II (VVP-II) chungchanga Ministry of Home Affairs-a border management secretary Dr Rajendra Kumar a hmuhna-ah minister hian a sawi a. Mizoram chhung a khaw tam tak, tuna VVP II a la tel lo khua, tel thei site chu a tahtawla telh zel ni se tih Dr Rajendra Kumar hnenah hian a thlen bawk. Border Management Secretary hian VVP II inkaihhruaina chu peih a nih veleh a sum pekchhuahna tur pawh Ministry lam an inpeih thu sawiin, Mizoram Sorkarin sum a dawnte hmang zo vat thin turin a lo chah a. VVP II hnuaia thingtlang khua la telh ve loh te pawh budget hman phawt a nih hnu-ah ennawn theih a ni ang tih Minister hi a lo hrih a ni. Prof. Lalnilawma hi rural development additional secretary Pu V.Lalengmawia leh private secretary Pu K.Lalnuntluanga te'n an tawiawm a ni.

LUNGLEI EDUCATION

Minister Pi Lalrinpuii chuan, Cabinet thukhawmin Pukpui a Mizoram Engineering College a thawk tur hna 63 siam tura thutlukna a siam tawh thu leh 2026 atanga zirna hi kalpui tan tura ruahmanna siam a nih tawh thu nimin khan a sawi.

MZP Hqrs Lunglei President Pu Johan Hmangaihzualla Ralte leh Secretary Pu K.Lalchhuanawma te'n nimin khan Pi Lalrinpuii hi Lunglei district-a zirna lam hmasawna hrang hrang an sawipui a. Mizoram engineering college bakah hian MZP Hqrs Lunglei hruiute hian Lunglei Government College-a dah tur smart board leh college bus chungchang te Minister hnenah hian an thlen a. Smart board chu tun dinhmunah CSR hmanga chah mek a nih thu leh a lo thlen thuai tur thu minister hian a hrih a. Lunglei government college bus tur chu Lunglei MLA te'n education fund hmanga hma an lakpui tur thu a lo hrih bawk a ni.

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni.

Zanin dar 6 leh a chanve-ah Chanchinthar puan leh a ni ang.

MPYCC

Mizoram Pradesh Youth Congress Committee (MPYCC) chuan ZPM chu kum 2023 assembly inthlan dawnah BJP-in sum leh pai tam tham taka tanpuiah an puh.

Nimina MPYCC thuchhuah tarlan danin central-a BJP Minister-te leh party hruiute chuan MNF ai a ZPM hmanrua a hman an duh avanga kum 2023 MLA inthlana sum leh paia an puih thu langsar takin an sawi an ti a. Mizoram BJP Hruaitute pawhin hei hi a dik tih an sawi an ti bawk. BJP thiana siam tum leh thawhpuiina hming zia an nih avangin kum 2023 MLA inthlan vote thlak hnaih tawh takah khan ZPM MLA Candidate-te chu sum leh pai-ah Mizoram mipui mak tih khawpin an hnianghnar thut niin an sawi a, BJP in ZPM candidate-te sum leh paia an puih avangin he sorkar hian na taka BJP lam thil phut let lian tak an tih hlawhtlin ngam loh avangin Mizoram chusum leh paiah hrek a ni mek niin an sawi a. Sum harsatna avangin ruihhlo tawh a hluar ni a sawiin, Party Fund leh Party Office leina tur sum mamawh tak ZPM party chu an Minister zin haw thlengin Assam rifle hovin tum hnih an lo ti ding hial a ni, an ti.

Congress thalaite chuan ZPM party chu an insawi angin an awm lo zui zel nia sawiin , danglam bik tura inzuar siin Sorkar kal sual tur vengtu tura an zawrh VUC in MLA hlawn tihpun do tur leh tihpun a nih pawha MLA hlawn hlui la tura a ti chungin a vai-in an la an ti a, car pakhat chauh kawh intiam a, CM leh Minister Bangalow cheina senso ti ve lo tura

inzuarin sorkar kal tawh te aia uchuakin mipui pawisa hmangin an che leh si a. Hei hi mipui bumna leh mipui rawkna dik tak zawk chuani an ti a, kum 2023 MLA inthlan hmain ZPM Chief Minister chuan portfolio a neih ve dawn loh thu leh Minister te hnathawh a enpui ang a, chak lo te a dawm kang dawn tih an sawite chu inbumna a nihzia an sorkar hian a takin a pholang a. Hna chanpual neih loh chu sawi loh department pawimawh tak tak changin Minister dang Department chan pawh a chhuhsak duh zel zawk a ni an ti a, minister-te chu sorkar laipui dawr tha ngam tawh lovah an puh bawk ani.



DRUG SEIZURE

Nimin tlai khan Hnahthial District Excise & Narcotics hnathawkten New Ngharchhip khua-ah heroin hawng 10, gram za sawm panga (115 gms) an man a, an ruihhlo man hi cheng nuai thum leh singnga hu ni a chhut a ni a. Excise & Narcotics duty-te hian an thudawn bawhzui-in New Ngharchhip daiah heroin kawltu ni a rin, Lalhmingtluanga (47) s/o Kaphranga (L), New Ngharchhip football ground bula awm ni a insawi chu an dap a. A heroin kawl lai, hawng li leh a in a a dah that, hawng ruk chu a dahna bag leh thir thingrem nen chuan an man a ni. Nizan vek khan Hnahthial Excise & Narcotics hian, thil tih tul pawimawh hrang hrang buaipui nghalin thubuai an zia fel a. An mi man leh an ruihhlo mante hi vawiinah Lunglei district court panpui nghal an ni.

